

少陵新譜
胡光輝題



156460

之
陵
新
譜
續
九
年
星
印

李春坪輯

少陵新譜

喬曾勛題



少陵新譜
全一冊

民國二十四年三月初版

實價大洋捌角

輯著者 李春坪

出版者 兼
北平琉璃廠一八二
來薰閣書店

分售處 各埠大書坊

自序

晚近新會梁氏卓如治學精密嘗檢討陶淵明史蹟成評論年譜詩集考證解題諸作余夙好杜詩比有以爲杜公作傳記相勗者則念少陵生平事實大率見於彼所賦詩解題一事實表現少陵法之至善遂斟酌梁氏治陶方法而以解題爲主製事略詩表用代年譜訂家系官歷表游歷地域圖釋交游名氏錄各一定其次第以成此書至作品年次係據仇氏序列略事變更詩題解說蓋酌採仇註與杜詩鏡銓杜工部詩話圍爐詩話杜詩義法並參以己意第成書倉卒抉剔容或未盡乖誤亦恐不免俟有發見當加匡補姑先付刊布在求是正於大雅云爾

二十二年十月李春坪書於白下浣心室

杜甫畫像



少陵新譜目次

一 杜甫事略

二 杜甫家系

三 杜甫官歷表

四 杜甫游歷地域圖 附地名釋

五 杜甫交游名氏錄 附名不可考者一覽

六 杜詩年表與解題

杜甫事略

杜甫、字子美、號少陵、襄陽（今湖北）人、世居河南鞏縣。（甫嘗自稱京兆杜甫、少陵野老、以其祖元凱爲京兆人故云。）

舊唐書本傳曰、杜甫、字子美、本襄陽人、後徙河南鞏縣。

分門杜詩王序曰、杜甫、字子美、襄陽人、徙河南鞏縣。

蔡興宗編譜謂先生姓杜氏、諱甫、字子美、其先襄陽人、後徙河南之鞏縣。

生於唐睿宗先天元年、歲次壬子。

朱鶴齡編譜謂唐睿宗先天元年、壬子甫生。

七歲能詩。

壯遊詩云、七齡思卽壯、開口詠鳳凰。

及長、以文學見重於前輩李邕等。

壯遊詩云、往昔十四五、出遊翰墨場、斯文崔魏徒、以我似班揚。

奉贈韋左丞丈詩云、甫昔少年日、早充觀國賓、讀書破萬卷、下筆如有神。賦

料揚雄敵、詩看子建親、李邕求識面、王翰願卜鄰。

新唐書本傳曰、甫少貧不自振、客齊趙吳越間、李邕奇其才、先往見之。

開元十八九年間、嘗遊晉地、二十三年、歸自吳越、舉進士不第。

哭韋之晉詩云、悽愴郇瑕邑、差池弱冠年。

舊唐書本傳曰、甫天寶初

當作開元末

應進士不第。

壯遊詩云、歸帆拂天姥、中歲貢舊鄉、忤下考功第、獨辭京兆堂。

朱鶴齡編譜謂公自吳越歸、赴京兆貢舉不第。

朱又曰、唐初考功郎、掌貢舉、至開元二十四年、考功郎李昂爲舉人詆訶、帝以員外郎望輕、徙禮部、以侍郎主之。則公下考功第、在二十三年、蓋唐制年年貢士也。

乃去長安、往來齊趙之間、歷八九載始西返。

壯遊詩云、放蕩齊趙間、裘馬頗清狂。快意八九年、西歸到咸陽。

天寶六載、詔有一藝以上者、詣京師。甫應詔退下。

朱鶴齡編譜謂天寶六載、丁亥。公應詔退下、留長安。

元結諭友文曰、天寶六載、詔天下有一藝詣轂下、李林甫命尙書省試、皆下之、遂賀野無遺賢。

唐書李林甫傳曰、天寶六載、帝詔天下通一藝以上者、皆詣京師。林甫恐對策者斥言其奸、乃委尙書省覆試、遂無一人及第。

未幾、進三大禮賦、受知於玄宗、卒因李林甫忌刻、仍置閒散。

舊唐書本傳曰、天寶末、獻三大禮賦、玄宗奇之、召試文章。

新唐書本傳曰、天寶十三載、玄宗朝獻太清宮、饗廟及郊、甫奏賦三篇、帝奇之。使待制集賢院、命宰相試文章。

朱鶴齡編譜謂天寶十載、辛卯。公年四十、在長安、進三大禮賦、玄宗奇之、命待制集賢院。天寶十一載、壬辰。公在長安、召試文章、送隸有司、參列選序。

奉贈鮮于京兆詩云、獻納紆皇眷、中間謁紫宸。且隨諸彥集、方覲薄才伸、破

膽遭前政、陰謀獨秉鈞、微生露忌刻、萬事益酸辛。

天寶十四載。授河西尉、不拜。改右衛率府胄曹參軍。

新唐書本傳曰、擢河西尉、不拜。改右衛率府胄曹參軍。

分門杜詩王序曰、授河西尉、辭不行。改右衛率府胄曹。

夔府書懷詩云、昔罷河西尉、初興薊北師。

朱鶴齡編譜謂天寶十四載、乙未。授河西尉、不拜。改右衛率府胄曹參軍。

祿山亂作、甫適往奉先。（今陝西蒲城）。

詩史曰、薊北反書未至、公已逸身畿甸。

魯豈編譜謂十四載十一月、安祿山反、陷河北諸郡。公有自京赴奉先作註云、此年十一月作。

明年、肅宗卽位靈武、（今甯夏靈武）自鄜赴行在、竟陷賊中。

新唐書本傳曰、肅宗立、自鄜州羸服欲奔行在、爲賊所得。

月夜詩鶴注曰、天寶十五載八月、公自鄜州赴行在、爲賊所得。

又明年、脫賊、謁肅宗於鳳翔、拜左拾遺、以言房瑁不宜罷免、幾罹於罪。

新唐書本傳曰、至德二載、亡走鳳翔、上謁、拜左拾遺。與房瑁爲布衣交、瑁時敗陳濤斜、又以客董廷蘭罷宰相。甫上疏言罪細不宜免大臣、帝怒、詔三司推問、宰相張鎰曰、甫若抵罪、絕言者路、帝乃解。

朱鶴齡編譜謂至德二載、丁酉。四月脫賊、謁上鳳翔、拜左拾遺、疏救房瑁、上怒、詔三司推問、宰相張鎰救之獲免。

其後房瑁被貶幽州（治今陝西邠縣）刺史、甫同時遷華州（治今陝西華縣）司功。

分門杜詩王序曰、肅宗怒、貶瑁幽州刺史、出甫爲華州司功。

移華州掾詩胡夏客註曰、至德二載、公拜左拾遺、卽疏救房瑁、時瑁罷相猶在朝、故公仍爲拾遺。至乾元元年五月、瑁貶。六月、公卽出爲華州司功參軍矣。

甫居華一年、值關輔有災、因棄官往秦州、（治今甘肅天水）復往成州（治今甘肅成縣）以資生無計、又携家入蜀。其中居秦州不過數月、居成州尙不踰月。

新唐書本傳曰、關輔饑、輒棄官去、客秦州負薪採橡栗自給、流落劍南。

分門杜詩王序曰、屬關輔饑亂、棄官之秦州、又居成州同谷、自負薪採梠餉糒不給、遂入蜀。

發同谷縣詩云、始來茲山中、休駕喜地僻。奈何迫物累、一歲四行役。原註云、乾元二年十二月一日、自隴右赴成都紀行。仇注云、居同谷不踰月。在成都、得友朋助力、營草堂於城西浣花溪。

蔡興宗編譜謂上元元年、庚子。是歲春卜居成都浣花溪。

朱鶴齡編譜謂上元元年、庚子。公在成都、卜居浣花溪。

詩題有王司馬攜營茅屋資相訪、王錄事許寄草堂資不到、蕭八明府實處覓桃栽、從韋二明府續處覓綿竹、憑何十一少府邕覓榿木栽、憑韋少府班覓松樹子栽、又於畫處乞大邑瓷盤、詣徐卿覓果栽、

錢謙益曰、卜居詩云、浣花流水水西頭。狂夫詩云、萬里橋西一草堂、百花潭水卽滄浪。堂成云、背郭堂成蔭白茅。西郊詩云、時出碧雞坊、西郊向草堂。懷錦水居止詩云、萬里橋南宅、百花潭北莊。然則草堂背成都郭、在西郊碧雞

坊外萬里橋南、百花潭北、浣花水西、歷歷可觀。

甫居草堂二年、值嚴武領東西川節度使、武故與甫有世誼、（武父挺之爲甫故人。）因相往還。武還朝、甫送至綿州（治今四川綿陽）。因入梓州。（治今四川三台）

舊唐書本傳曰、武與甫世舊、待遇甚隆。

新唐書本傳曰、武以世舊、待甫甚善、親詣其家。

蔡興宗編譜謂寶應元年、壬寅。春建卯月。有說旱文註曰、初中丞嚴公節制劍南日奉此說。

嚴中丞枉駕見過詩盧注曰、至德二載、上皇還京、分劍南東西兩川、各置節度、是兩川始分也。寶應元年、嚴武爲東川節度、更除西川、權攝東川、此詩所謂川合東西也。

魯豈編譜謂寶應元年、壬寅。武至成都。公奉和嚴中丞西城晚眺詩、蜀困於調度、嚴數從公往來。

詩題有酬嚴公寄題野亭、嚴中丞枉駕見過、遭田父泥飲美嚴中丞。和嚴中丞西

城晚眺、嚴公垂寄奉答二絕、謝嚴中丞送乳酒、嚴公枉駕草堂、嚴公廳宴詠蜀道畫圖、送嚴公入朝十韻、送嚴侍郎至綿州、

分門杜詩胡序曰、嚴武入朝、先生送武至巴西、遂如梓州。

既入梓州、嗣又迎家同住、依留後章彝。時自寶應元年秋、至廣德二年春。

客夜詩鶴注曰、寶應元年秋、自綿至梓、時家在成都、秋晚方迎家再至梓、因秋夜而賦此。仇注曰、衣食仗友生。（計拙無衣食、途窮仗友生。）舊謂依東蜀高適者非、嚴武入朝後、適移西川、公已攜家入梓矣。在梓州時、最善章彝、仗友或指此耶。

嚴中丞枉駕見過詩盧注曰、嚴武被召還朝、西川節度高適代之。東川節度虛懸、以章彝爲留後。

城上詩顧注曰、此是廣德二年春、自梓州往閬州時作。

滕王亭子詩邵注曰、公於廣德二年自梓州往閬州來遊此亭。

後由梓州至閬州（治今四川閬中）。將下荆楚、以嚴武再鎮蜀、乃挈眷歸草堂。武表爲

節度參謀、檢校工部員外郎、賜緋魚袋。

分門杜詩胡序曰、乃之閬州、將遊荆楚、會武再鎮兩川、先生乃自閬州挈妻子歸草堂、武辟先生爲參謀。

朱鶴齡編譜謂廣德二年、甲辰。春復自梓州往閬州、嚴武再鎮蜀、春晚遂歸成都草堂。六月、武表爲節度參謀、檢校工部員外郎、賜緋魚袋。

甫以廣德二年六月、入嚴武幕府、永泰元年正月離去。不久武卒、郭英乂代、甫遂東下。

新唐書本傳曰、永泰元年夏、武卒、甫無所依、及郭英乂代武鎮成都、英乂武人、羸暴、無能刺謁、乃遊東蜀。

詩題正月三日歸溪上有作簡院內諸公、鶴注曰、當是永泰元年春自幕府歸浣花溪作。

左峴草堂記曰、六月在武幕中、武表爲節度參謀、檢校工部員外郎。幕中多不合意、故有晚晴懷西郭茅舍之作。至次年改元永泰、乙巳。卽辭幕府歸浣花溪。

草堂。四月、嚴武卒、郭英乂代武、英乂武人。粗暴、無能刺謁、公流落劍外無所依、卽于五月舍草堂南下。

居雲安（今四川雲陽）。數月、大歷元年春、遷夔州。（治今四川奉節）居夔兩年出峽。

十二月一日三首詩鶴注曰、永泰元年秋、公至雲安、是冬在雲安作。明年春晚遷居夔州。

詩題有大歷三年春白帝城放船出瞿塘峽久居夔府將適江陵漂泊有詩凡四十韻。甫出峽、先至江陵、徙公安、於大歷三年冬至岳州。

朱鶴齡編譜謂大歷三年、戊申。正月去夔出峽、三月至江陵、秋移居公安、冬晚之岳州。

泊岳陽城下詩鶴注曰、當是大歷三年冬深作。

次歲正月、自岳往潭州。（治今湖南長沙）

蔡興宗編譜謂大歷四年、己酉。春初發岳陽、泛洞庭、至潭州。

朱鶴齡編譜謂大歷四年、己酉。正月自岳州之潭州。